



Inatsisartunut ilaasortaq Nivi Olsen
/MAANI

**Aalisarneq pillugu inatsimmut tunngatillugu § 37 naapertorlugu
apeqquteqaammut nr. 2018-003-mut akissuteqaat**

Ulloq: 18-01-2018
Sullap nr: 2018 - 1274
All nr: 7036058

Asasara Nivi Olsen

Postboks 269
3900 Nuuk
Oqarasuaat (+299) 34 50 00
Fax (+299) 34 63 55
E-mail: apn@nanoq.gl
www.naalakkersuisut.gl

Aallaqqaasiullugu Inatsisartut suleriaasissaanni § 37 naapertorlugu aalisarneq pillugu inatsimmut tunngatillugu apeqqutinut qujaffigissavakkit.

Apeqqut 1: Killilingaanngitsumik pisassiissutit atorunnaarsinneqarnerisa inatsisitigut taarsiiffigineqarnissakkullu kinguneranik inuussutissarsiortut taarsiiffigineqaqqullutik piumasaqarsinnaanerit pillugu Kammeradvokatip nalunaarusaanik Naalakkersuisut Inatsisartunut tunniussiumannginnerannut suna pissutaava?

Akissut: Inatsisartut suleriaasissaanni § 37 naapertorlugu "pisortat suliassaat" pillugit § 37 aqquitalugu apeqquteqartoqarsinnaavoq. Inatsisitigut nassuiaatitalimmik akissuteqaasiortitsinerit eqqartuussivikkoortitsisoqarsinnaagaangat Naalakkersuisut illersorniarlugit atorneqartarput, taamaammallu pisortanut suliassaanani.

Pisortat ingerlatsineranni paasitinneqarsinnaatitaaneq pillugu inatsimmi § 10, nr. 4 naapertorlugu Kammeradvokatip inatsisitigut nassuiaatitalimmik akissuteqaataa allagaatinik takunnissinnaatitaanermut ilaatinneqanngilaq, pisortat immikkullu paasisimasallit eqqartuussissutigisassani imaluunniit suliassap eqqartuussisunut tunniunneqartariaqarnerata isumaliutiginerani atugassatut allaffigeqatigiinnerannut tunggammatt.

Naalakkersuisulli Inatsisartut Aalisarnermut Ataatsimiititaliaannut imaqarniliamik tunniussiniarput, paasissutissat eqqartuussissuserisoq/sullitalu akornanni isertuussinissamut tunggassuteqartut minillugit.

Apeqqut 2: Nalunaarummut pineqartumut tunngatillugu allattugaatinik takorusullutik qinnuteqarsimasut minnerpaamik marluusunut Naalakkersuisut itigartitsisimanerannut suna pissutaava aamma Naalakkersuisut isumaqarpat, itigartitsinerat Pisortat ingerlatsineranni paasitinneqarsinnaatitaaneq pillugu inatsimmut naapertuuppa?

Akissut: Allattugaatinik takunninnissamik qinnuteqaatit aalisarnermut naalakkersuisoqarfimmit nalilersorneqartarput tamatigullu pisortat ingerlatsineranni paasitinneqarsinnaatitaaneq pillugu inatsimmi malittarisassat tunggaviillu naapertorlugit ataqqillugillu nalilersuisoqartarluni. Apeqqummut 1-imut akissutigisakka innersuussutigaaqka.

Apeqquut 3: Naalakkersuisut tamarmik isumaqatigiillutik aalajangiippat nalunaarut isertuunneqassasoq?

Akissut: Naalakkersuisut sulinerminni tunngavigisaat pissutigalugit Naalakkersuisut iluminni pissutsit pillugit oqaaseqaateqarneq ajorput.

Apeqquut 4: Suliamut tunngatillugu allanik soqutiginaateqarsinnaasunik Naalakkersuisut tusarliussassaqarpat?

Akissut: Naamik.

Inussiarnersumik inuulluaqqusillunga


Karl-Kristian Kruse

Aalisarnermut Piniarnermullu Naalakkersuisoq



10. januar 2018

Inatsisartut Suleriaasianni § 37 imm. 1 naapertorlugu Naalakkersuisunut apeqquq imaattoq matumuuna saqqummiuppara:

Naalakkersuisunut apeqquq:

- 1. Killilingaanngitsumik pisassiissutit atorunnaarsinneqarnerisa inatsisitigut taarsiiffigineqarnissakkullu kinguneranik inuussutissarsiortut taarsiiffigineqaqqullutik piunasaqarsinnaanerata pillugu Kammeradvokatip nalunaarusiaanik Naalakkersuisut Inatsisartunut tunniussiumannginnerannut suna pissutaava?**
- 2. Nalunaarummut pineqartumut tunngatillugu allattugaatinik takorusullutik qinnuteqarsimasut minnerpaamik marluusunut Naalakkersuisut itigartitsisimanerannut suna pissutaava aamma Naalakkersuisut isumaqarpat, itigartitsinerat Pisortat ingerlatsineranni paasitinneqarsinnaatitaaneq pillugu inatsimmut naapertuuppa?**
- 3. Naalakkersuisut tamarmik isumaqatigiillutik aalajangiippat nalunaarut isertuunneqassasoq?**
- 4. Suliamut tunngatillugu allanik soqutiginaateqarsinnaasunik Naalakkersuisut tusarliussassaqarpat?**
(Inatsisartunut ilaasortaq Nivi Olsen, Demokraatit)

Tunngavilersuut

Naalakkersuisunit Kammeradvokati iminneqarpoq nalunaarusioqqullugu, nalilerumallugu inatsisitigut taarsiiffigineqarnissakkullu killilingaanngitsumik pisassiissutit atorunnaarsitsineq qanoq inuussutissarsiortut taarsiiffigeqqusinnaanerannik kinguneqarsinnaanersoq.



Paasinarsivorlu maannakkut Naalackersuisut nalunaarut taannarpiaq pillugu Inatsisartunut innuttaasunulluunniit paasissutissiumannngitsut. Demokraatini tamanan eqqumiigilluinnarparput isornarlunnartutullu isigalugu.

Aalisameq inuutissarsiutitta annerpaartaraat aamma Inatsisartuni aalisarnermut inatsit pisariusorsuaq suliaringaangatsigu pingaaruteqarluinnarpoq paasissutissanik tamakkiisunik pilersorneqartarnissarput. Annertuumik aalajangiisussaavugut inuiaqatigiit aningaasarsiomerannut annertuumik sunnuteqartussamik. Taamaattumik pissusissamisuunngilaq Naalackersuisut paasissutissanik pingaaruteqarluinnartunik uangutsinnut tunniussiumannginnerat.

Tamanna tunngavigalugu Demokraatini Naalackersuisut sakkortuumik kaammattussavagut apeqqutigut akeqqullugit taamatullu apeqqusersuinertaqanngitsumik Kammeradvokatip nalunaarusiaa tamanut saqqummiunneqassasoq.

Apeqqutit akeqquakka ullut suliffiit naliginnaasut qulit iluanni.